

GJALDSKRÁ

Umhverfisstofnunar.

I. KAFLI

Almennt.

Gjald fyrir útselda vinnu sérfræðings.

1. gr.

Umhverfisstofnun innheimtir gjald samkvæmt gjaldskrá þessari sem nemur kr. 6.500 fyrir sérfræðing og kr. 4.000 fyrir fagritara á hverja klukkustund fyrir verkefni og þjónustu sem stofnuninni eru falin í lögum og reglugerðum og sem heimilt er að taka gjald fyrir.

Ferðakostnaður.

2. gr.

Umhverfisstofnun innheimtir ferða- og upphaldskostnað í samræmi við reglur ferðakostnaðarnefndar fjármálaráðuneytisins.

Innheimta.

3. gr.

Eindagi gjalda skv. gjaldskrá þessari er 30 dögum eftir útgáfu reiknings. Dráttarvextir reiknast frá gjalddaga hafi gjöld ekki verið greidd á eindaga. Heimilt er að innheimta kostnað sem hlýst af innheimtu gjalda séu þau ekki greidd á eindaga.

II. KAFLI

Leyfisveitingar og fleira.

Starfsleyfi fyrir atvinnurekstur sem getur haft í för með sér mengun.

4. gr.

Umhverfisstofnun innheimtir gjald fyrir vinnslu og útgáfu starfsleyfa af fyrirtækjum sem stunda atvinnurekstur sem talinn er upp í fylgiskjali 1 og I. viðauka með reglugerð nr. 785/1999 um starfsleyfi fyrir atvinnurekstur sem getur haft í för með sér mengun, samkvæmt 8. gr. reglugerðarinnar. Umhverfisstofnun innheimtir gjald fyrir vinnslu og útgáfu starfsleyfa fyrir móttökustöð úrgangs skv. 2. mgr. 5. gr. laga nr. 55/2003 um meðhöndlun úrgangs.

Gjald fyrir vinnslu nýs starfsleyfis er tvíþætt:

A. Kostnaður við móttöku, grunnvinnu við gerð starfsleyfisdraga, auglýsingar, útgáfu og kynnisfundi er sem hér segir:

Eftirlitsflokkur	Upphæð
1. flokkur	kr. 329.000
2. flokkur	kr. 264.000
3. flokkur	kr. 125.000
4. flokkur	kr. 73.000

Reikningur fyrir fastagjaldi skal gefinn út við móttöku umsóknar.

B. Fyrir frekari vinnu við gerð starfsleyfistillagna, vinnslu og afgreiðslu innsendra athugasemda og fyrir kynningu umfram lágmarks kynningu, sbr. A lið skal greiða tímagjald samkvæmt 1. gr., ferðakostnað skv. 2. gr. og annan útlagðan kostnað. Þegar ljóst er að útgáfa

leyfis hefur í för með sér umframvinnu skal umsækjanda gerð grein fyrir umfangi þeirrar vinnu. Reikningur vegna frekari vinnu skal gefinn út þegar drög að starfsleyfi liggja fyrir.

Fyrir endurskoðun og breytingu á starfsleyfi samkvæmt IX. kafla reglugerðar nr. 785/1999 um starfsleyfi fyrir atvinnurekstur sem getur haft í för með sér mengun og fyrir breytingu og endurskoðun á starfsleyfi samkvæmt 4. og 5. mgr. 5. gr. laga nr. 55/2003 um meðhöndlun úrgangs skal greiða tímagjald samkvæmt 1. gr. gjaldskrárinnar vegna vinnu sérfræðinga og fyrir ferðir skv. 2. gr. ásamt útlögðum kostnaði m.a. við auglýsingar. Reikningur skal gefinn út þegar drög að starfsleyfi liggja fyrir.

Starfsleyfi fyrir garðaúðun og eyðingu meindýra.

5. gr.

Umhverfisstofnun innheimtir gjald til að standa undir kostnaði við útgáfu starfsleyfa fyrir þá sem starfa við garðaúðun í atvinnuskyni í samræmi við reglugerð nr. 238/1994, um garðaúðun, og fyrir þá sem vinna við eyðingu meindýra í samræmi við reglugerð nr. 149/1989 um meindýraeyða, sbr. 6. mgr. 23. gr. laga nr. 52/1988, um eiturefni og hættuleg efni. Gjaldið skal vera:

	Upphæð
a. Gjald fyrir starfsleyfi sem veitt er í fyrsta skipti	kr. 23.500
b. Gjald fyrir endurnýjun leyfisskírteina	kr. 10.500

Reikningur skal gefinn út við móttöku umsóknar.

Hafi útgáfa leyfis í för með sér meiri kostnað fyrir Umhverfisstofnun en nemur gjaldi skv. 1. mgr. er heimilt að innheimta tímagjald fyrir slíka umframvinnu skv. 1. gr. Þegar ljóst er að útgáfa leyfis hefur í för með sér umframvinnu skal umsækjanda gerð grein fyrir umfangi þeirrar vinnu. Reikningur vegna frekari vinnu skal gefinn út þegar drög að starfsleyfi liggja fyrir.

Leyfi fyrir aukefni í matvæli.

6. gr.

Umhverfisstofnun innheimtir gjald vegna vinnslu umsóknar um bráðabirgðaleyfi fyrir aukefni í matvæli, skv. 10. gr. reglugerðar nr. 285/2002 um aukefni í matvælum. Umsóknaraðili greiðir tímagjald skv. 1. gr. og ferðakostnað skv. 2. gr. vegna vinnslu við umsóknir vegna bráðabirgðaleyfis fyrir aukefni í matvæli. Reikningur skal gefinn út þegar ákvörðun um útgáfu leyfis fyrir aukefni í matvælum liggur fyrir.

Leyfi fyrir bætiefni í matvæli.

7. gr.

Umhverfisstofnun innheimtir gjald vegna vinnslu umsókna um leyfi fyrir bætiefni í matvæli, skv. 19. gr. reglugerðar nr. 285/2002 um aukefni í matvælum. Innheimta skal gjald fyrir umfjöllun um hvert bætiefni sem sótt er um í hverja vöru. Umsóknaraðili greiðir tímagjald skv. 1. gr. og ferðakostnað skv. 2. gr. vegna vinnslu við umsóknir um leyfi fyrir bætiefni í matvæli. Reikningur skal gefinn út þegar ákvörðun um útgáfu leyfis liggur fyrir.

Leyfi fyrir notkun fullyrðinga.

8. gr.

Umhverfisstofnun innheimtir gjald vegna vinnslu umsókna um leyfi fyrir notkun á fullyrðingum varðandi matvæli og innihaldsefni þeirra, skv. 34. gr. reglugerðar nr. 588/1993 um merkingu, auglýsingu og kynningu matvæla. Umsóknaraðili greiðir tímagjald skv. 1. gr. og

ferðakostnað skv. 2. gr. vegna vinnslu við umsóknir um leyfi fyrir notkun á fullyrðingum varðandi matvæli og innihaldsefni. Reikningur skal gefinn út þegar ákvörðun um útgáfu leyfis liggur fyrir.

Leyfi fyrir notkun erfðabreyttra lífvera.

9. gr.

Umhverfisstofnun innheimtir gjald vegna vinnslu umsóknar um leyfi fyrir afmarkaða notkun erfðabreyttra örvera skv. 8. gr. reglugerðar nr. 275/2002 og afmarkaða notkun erfðabreyttra lífvera annarra en örvera skv. 8. gr. reglugerðar nr. 276/2002. Innheimta skal gjald sem nemur kr. 30.000. Reikningur skal gefinn út við móttöku umsóknar.

Umhverfisstofnun innheimtir gjald vegna vinnslu umsóknar um leyfi fyrir sleppingu eða dreifingu og markaðssetningu erfðabreyttra lífvera skv. 5. og 19. gr. reglugerðar nr. 493/1997. Umsóknaraðili greiðir tímagjald skv. 1. gr. og ferðakostnað skv. 2. gr. vegna vinnslu umsóknar um leyfi fyrir sleppingu eða dreifingu og markaðssetningu erfðabreyttra lífvera. Reikningur skal gefinn út þegar ákvörðun um útgáfu leyfis liggur fyrir.

Sé útgáfa leyfis umfangsmikil og hafi í för með sér meiri kostnað fyrir Umhverfisstofnun en fjallað er um í 1. mgr. er heimilt að innheimta tímagjald fyrir slíka umframvinnu skv. 1. gr. Þegar ljóst er að útgáfa leyfis hefur í för með sér umframvinnu skal umsækjanda gerð grein fyrir umfangi þeirrar vinnu. Reikningur vegna frekari vinnu skal gefinn út þegar ákvörðun um útgáfu leyfis liggur fyrir.

Gjald vegna útgáfu leyfis til að halda dýr í atvinnuskyni.

10. gr.

Umhverfisstofnun innheimtir gjald fyrir útgáfu leyfa til hvers konar ræktunar, verslunar, þjálfunar, tamningar, geymslu, snyrtingar og leigu dýra í atvinnuskyni sem ekki fellur undir búfjárhald skv. 12. gr. laga nr. 15/1994 um dýravernd með síðari breytingum. Gjaldið skal vera:

a. Leyfi til dýrasýninga og dýrahappdrættis	Upphæð kr. 7.000
b. Önnur leyfi vegna dýrahalds í atvinnuskyni	kr. 39.500
c. Endurnýjun annarra leyfa vegna dýrahalds í atvinnuskyni en leyfa til dýrasýninga og dýrahappdrættis	kr. 26.500

Reikningur skal gefinn út við móttöku umsóknar.

Hafi útgáfa leyfis í för með sér meiri kostnað fyrir Umhverfisstofnun en nemur gjaldi skv. 2. mgr. er heimilt að innheimta tímagjald fyrir slíka umframvinnu skv. 1. gr. Þegar ljóst er að útgáfa leyfis hefur í för með sér umframvinnu skal umsækjanda gerð grein fyrir umfangi þeirrar vinnu. Reikningur vegna frekari vinnu skal gefinn út þegar ákvörðun um útgáfu leyfis liggur fyrir.

III. KAFLI

Eftirlit.

Gjald fyrir mengunarvarnaeftirlit með starfsleyfisskyldri starfsemi.

11. gr.

Umhverfisstofnun innheimtir gjald af fyrirtækjum sem stofnunin hefur eftirlit með skv. 12. og 13. gr. reglugerðar nr. 786/1999 um mengunarvarnaeftirlit og stunda atvinnurekstur sem talinn er upp í fylgiskjali 1 og I. viðauka með reglugerðinni, að undanskildum atvinnurekstri samkvæmt liðum 6.4, 6.5 og 6.6 í viðaukanum. Umhverfisstofnun innheimtir gjald

fyrir eftirlit með móttökustöðvum úrgangs skv. 1. mgr. 21. gr. laga nr. 55/2003 um meðhöndlun úrgangs.

Vegna reglubundins eftirlits, skv. 2. mgr. 12. gr. í reglugerð nr. 786/1999 um mengunarvarnaeftirlit og eftirlit sem nánar er kveðið á um í starfsleyfi fyrirtækis, skal innheimta gjald sem hér segir:

Eftirlitsflokkur	Upphæð
1. flokkur	kr. 273.000
2. flokkur	kr. 162.500
3. flokkur	kr. 110.500
4. flokkur	kr. 78.000

Reikningur skal gefinn út þegar eftirlitsskýrsla liggur fyrir.

Vegna reglubundinna eftirlitsmælinga, skv. 2. mgr. 12. gr. í reglugerð nr. 786/1999 um mengunarvarnaeftirlit og því sem nánar er kveðið á um í starfsleyfi fyrirtækis, skal innheimta tímagjald samkvæmt 1. gr. auk ferðakostnaðar skv. 2. gr. svo og útlagðan kostnað. Reikningur skal gefinn út þegar eftirlitsskýrsla liggur fyrir.

Vegna eftirlits skv. 5. mgr. 12. gr. í reglugerð nr. 786/1999 um mengunarvarnaeftirlit skal innheimta tímagjald samkvæmt 1. gr. auk ferðakostnaðar skv. 2. gr. svo og útlagðan kostnað. Reikningur skal gefinn út þegar eftirlitsskýrsla liggur fyrir.

Beiti Umhverfisstofnunar heimild skv. 6. mgr. 12. gr. reglugerðar nr. 786/1999 um mengunarvarnaeftirlit til að draga úr reglubundnu eftirliti hjá atvinnurekanda skal viðkomandi atvinnustarfsemi færast til í eftirlitsflokk skv. ákvörðun stofnunarinnar í samræmi við 2. mgr. 12. gr. reglugerðarinnar eða lækkun á gjaldi sem nemur minna eftirliti.

Sérstakt eftirlit með mannvirkjagerð og öðrum framkvæmdum.

12. gr.

Umhverfisstofnun innheimtir gjald, skv. sérstöku samkomulagi við framkvæmdaraðila, vegna kostnaðar stofnunarinnar við sérstakt eftirlit með mannvirkjagerð og öðrum framkvæmdum, skv. 2. mgr. 7. gr. laga nr. 44/1999 um náttúruvernd að teknu tilliti til innra eftirlits framkvæmdaraðila. Framkvæmdaraðili greiðir tímagjald skv. 1. gr. og ferðakostnað skv. 2. gr. auk annars útlagðs kostnaðar við eftirlitið. Um útgáfu reikninga meðan á hinu sérstaka eftirliti stendur fer skv. samkomulagi aðila.

Innflutningseftirlit með matvælum.

13. gr.

Umhverfisstofnun innheimtir gjald af fyrirtækjum til að standa undir kostnaði vegna innflutningseftirlits með matvælum, skv. 25. gr. laga nr. 93/1995 um matvæli, sbr. einnig III. t.l. ákvæða til bráðabirgða í lögum nr. 7/1998 um hollustuhætti og mengunarvarnir. Umhverfisstofnun innheimtir gjald sem nemur kr. 19.350.

Heimilt er að gera kröfu um að innflytjandi matvæla greiði nauðsynlegan rannsóknarkostnað vegna eftirlits með innflutningi matvæla skv. 27. gr. laga nr. 93/1995 um matvæli.

IV. KAFLI
Hæfnispróf og námskeið.

Hæfnispróf og veiðinámskeið fyrir veiðimenn.

14. gr.

Umhverfisstofnun heldur hæfnispróf fyrir veiðimenn og veiðinámskeið til undirbúnings hæfnisprófa á fyrirfram auglýstum tíma skv. 11. gr. laga nr. 64/1994 um vernd, friðun og veiðar á villtum fuglum og villtum spendýrum. Stofnunin innheimtir gjald vegna hæfnisprófa og námskeiða, sbr. 4. mgr. 11. gr. laganna, í samræmi við eftirfarandi:

	Upphæð
a. Prófgjald fyrir hæfnispróf á auglýstum próftíma	kr. 4.000
b. Prófgjald fyrir hæfnispróf utan auglýstra próftíma að óskum viðkomandi einstaklings (einkapróf)	kr. 6.000
c. Veiðinámskeið til undirbúnings hæfnisprófi og hæfnispróf	kr. 6.000

Greiða skal gjald vegna hæfnisprófa eða námskeiða áður en námskeið er settið eða próf þreytt.

V. KAFLI
Önnur verkefni.

Áritun innflutningsskjala.

15. gr.

Umhverfisstofnun innheimtir gjald til að standa undir kostnaði vegna áritunar innflutningsskjala kr. 1.000 skv. 6. mgr. 23. gr. laga nr. 52/1988. Reikningur skal gefinn út við móttöku innflutningsskjals.

Sé vinna við áritun umfangsmikil og hafi í för með sér meiri kostnað fyrir Umhverfisstofnun en fjallað er um í 1. mgr. er heimilt að innheimta tímagjald fyrir slíka umframvinnu skv. 1. gr. Þegar ljóst er að áritun innflutningsskjala hefur í för með sér umframvinnu skal umsækjanda gerð grein fyrir umfangi þeirrar vinnu. Reikningur vegna frekari vinnu skal gefinn út þegar ákvörðun liggur fyrir.

Heimild til innflutnings á matvælum.

16. gr.

Umhverfisstofnun innheimtir gjald til að standa undir kostnaði vegna afgreiðslu heimilda til innflutnings á matvælum kr. 1.000 sbr. 25. gr. laga nr. 93/1995, sbr. einnig ákvæði auglýsinga um takmörkun á innflutningi tiltekinnna matvæla sem í gildi eru á hverjum tíma. Reikningur skal gefinn út við móttöku á beiðni um heimild til innflutnings á matvælum.

Hafi vinna við afgreiðslu heimildar til innflutnings í för með sér meiri kostnað fyrir Umhverfisstofnun en sem nemur gjaldi skv. 1. mgr. er heimilt að innheimta tímagjald fyrir slíka umframvinnu skv. 1. gr. Þegar ljóst er að afgreiðsla heimilda hefur í för með sér umframvinnu skal umsækjanda gerð grein fyrir umfangi þeirrar vinnu. Reikningur vegna frekari vinnu skal gefinn út þegar ákvörðun um heimild til innflutnings liggur fyrir.

VI. KAFLI
Gildistaka og lagastoð.

Lagastoð.

17. gr.

Gjaldskrá þessi er sett samkvæmt heimild í 23. gr. laga nr. 52/1988 um eiturefni og hættuleg efni, 12. gr. laga nr. 15/1994 um dýravernd, 4. mgr. 11. gr. laga nr. 64/1994 um vernd, friðun og veiðar á villtum dýrum, 25., 26. og 27. gr. laga nr. 93/1995 um matvæli, 21. gr. laga nr. 7/1998, um hollustuhætti og mengunarvarnir, 3. mgr. 7. gr. laga nr. 44/1999 um náttúruvernd, 22. gr. laga nr. 18/1996 um erfðabreyttar lífverur og 4. mgr. 21. gr. laga nr. 55/2003 um meðhöndlun úrgangs. Gjaldskráin öðlast gildi 1. febrúar 2005.

Frá sama tíma falla úr gildi eftirfarandi gjaldskrár: nr. 636/2000 vegna hæfnisprófa og veiðinámskeiða fyrir veiðimenn, nr. 3/2001 vegna sérstakrar þjónustu á sviði matvælaeftirlits, nr. 137/2001 vegna eftirlits og vinnslu starfsleyfa á sviði mengunarvarna, nr. 417/2001 vegna eftirlits með mannvirkjagerð og framkvæmdum á vegum Náttúruverndar ríkisins, nr. 277/2002 vegna sérstakrar þjónustu á sviði eiturefna- og hollustuháttaeftirlits og nr. 817/2003 um útgáfu leyfa til dýrahalds í atvinnuskyni sem ekki fellur undir búfjárhald.

Umhverfisstjórnuneytinu, 14. janúar 2005.

F. h. r.

Magnús Jóhannesson.

Hrafnhildur Ásta Þorvaldsdóttir.